

DEO OPTIMO MAXIMO
UNI ET TRINO, 116.

VIRGINI DEI-PARÆ, ET S. LUCÆ,

Orthodoxorum Medicorum Patrono.

QUÆSTIO MEDICA,*
QUOD LIBETARIIS DISPUTATIONIBUS
manè discutienda in Scholis Medicorum, die Jovis trigesimâ
mensis Januarii, anno Domini M. DCC. LXXII.

M. FRANCISCO THIERY, Regis è salubri Consilio, Regii Medicorum Collegii Nanceii Socio honorario, Regiæque ejusdem civitatis Scientiarum & humaniorum Litterarum Academiæ, nec-non Biterrensis, Doctore Medico, Præside.

An inveteratis alvi fluxibus SIMAROUBA?

I.



QUANTA alvi fluxuum, tanta illos medicandi methodorum varietas. Morbi quidem vulgares inter cæteros, ac in principiis leves. Undè tamen tam crebrò ingravescent? quòve fit ut quis tot salubria celebrantur auxilia, plerumque vel efficacioribus non cedant? Si à proximiori causâ rectam curationis rationem petis, nulla videtur simplicior stomachi primum, dein intestinorum, functionis læsio: utri tamen ab excretorum naturâ exploratâ occurrere nitaris, votis sæpè cura non responderet. Nunc ex indigestis excretionibus Cœliacum tibi curandum judicas affectum; at incautum sæpius stomachica cardiacis, stomachicis absorbentia vicissim subministrabis. Nunc albicante dejectorum colore Lientericum, ob clausa vasorum lacteorum ac lymphaticorum ora, te suspicantem morbum fallunt mista anodynis aperientia. Si ex veterascence crudi ac serosi humoris fluxu pertinacem Diarrhoeam stomachum simul ac intestina afficientem agnoscis, an ei certò anocatharticus narcoticisque medeberis? Frequentemve ipsam furentis per intestina bilis excretionem, an acidula oleosis obtusa securè compe-scuisse expertus es? Non torminosæ cruoris ex intestino profluentis eruptiones mucum tenacem tingentes, quæ Dysenterix nomen audiunt, statim aut lenientibus, aut incidentibus, aut purgantibus, vomitoriis, ipsâque radice Brasiliânâ sedantur. Nec de continuæ humorum carnis loturam referentium evacuationis, licet absque doloribus Hepaticum fluxum nuncupatæ curâ amaris balsamicisque medicamentis, aquisve mineralibus susceptâ tibi plaudes. Extremum mali discrimen, diuturnitas: principiis non obstitisse peccatum grave fuit atrocibus symptomatibus luendum. Nutritio primum succo defraudatum corpus emaciatur, collquantur carnes, vires deficiunt, hinc acriori crudoque affluente excremento interior intestini membrana excoriatur, pungitivus urget interdum dolor, frequens inanisque instat deijciendi cupiditas, succedit abdominis tensio, vomitus, urinæ sufflaminatio, hydrops, femorum ac pedum intumescencia, frigus, deliria, spasinata & singultus proximæ certiorisque mortis nuntii.

I I.

AMINUS cognitâ labis causâ, tota ægritudo, omne periculum pender, undè salubriorum medicaminum fallax experientia. Errori occurrendum; illius originem non tam à pravâ alimentorum naturâ aut digestionem ac chylosi vitiat, quàm à præternaturali fibrarum intesti-

* Auctore M. ANTONIO DE JUSSIEU, anno 1730.

■ alium motu petamus. Qui spasmodicus in capitis, abdominis, artuum musculis tot varias morborum larvas induit, an non & intestina valet afficere? Quidni cum ficta sit in spiras fibrosæ eorum membranæ substantia, facilius huic motui non erit obnoxia? an quia obscure fit, oculisque non subiacet, ideò incertior? qui motus spontè propellendis inferiùs excrementis æquâ vibratione constat, num frequenter ac irregulariter non peragi potest? id insolitæ & repetitæ excretiones indicant, tormina teneasque ipse arguunt. Si ob ignotam Physiologi succi nervei naturam, motuum alias corporis partes convulsivè afficientium causam explanare antiquus labor fuit, intestina torquentium non minor est. Unum sufficit parem esse ab hoc frequentiori, irregularique motu symptomatum rationem. Aspice ut in Epileptici ab estræni alternâque nervorum distensione & atoniâ, omnis generis excrementa invitè eliminantur! Cerne, ut in singularibus oculi vel stomachi, vel uteri fibrarum spasmis lachrymæ ultrò fluunt, alimenta, ipse stomachalis succus evomuntur, & fluor albus exprimitur! sic durante aut renovato intestinorum spasio, compressæ eorum glandulæ exsudent mucum statim cæteris cum humoribus excrementitiis violenter protrusum miscendum. Sanguine tunc copiosius ad læsam illorum aliquam partem appellente ibique hærente, tenuicula ejus vasa liquore quasi à syphone anatomico injecto distenta tument, phænomenon in dissecis dysentericorum cadaveribus observatum, aliud irritamenti genus convulsivo superadditum ægritudinem diutius protrahens. Spasimum intestinale his characteribus non agnosceis? novum sume ex aliarum partium motus convulsivos curandi ratione argumentum. Quibus hi sedantur medicaminibus? anodynis, tensionem solventibus, dolorem lenientibus, non fortiorum narcoticorum velut opii more, sed temperatioribus quibus antispasmodicum nomen datum fuit: quæ si præternaturalem hunc intestinorum motum pariter compefcunt, vera certioraque inveterati alvi fluxus erunt remedia.

I I I.

INSANABILEM tamen morbum dicere pudebit cui debellando medicaminum myriades dicatæ sunt; vel desperatos non orco dabimus ægros semestri, annali, biennalique serosi aut sanguinolenti humoris bilifve fluxu laborantes, dum nulla est antiquorum recentiorumque Botanicorum pagina quæ alvum sistentibus aut antidysentericis non abundet: tantam nihilominus inter remedium copiam salubrius unum præ cæteris veteris ævi Medicos celebrasse nemo dubitat, nescio quo fato temporis successu perditum. Hoc Dioscorides, Plinius, Galenus & Serapio Macerem unanimi consensu appellant, corticem arboris in Barbariâ, ut aiunt, ætate suâ crescentis. Illum eundem admirandæ virtutis inter exotica, Europæorum commodo, recens reperta in Malabaricis oris & sanctæ Crucis insulâ Indiæ Orientalis, Garcias ab horto & Christophorus à Costa commemorant, paris, ut narravere antiquiores, efficaciam contra cruentas alvi excretiones, testes oculati. Talem Hispali Monardus, & apud Batavos Clusius simili in cortice ex his sibi regionibus allato admirati sunt. Huic etiam ferè omnino simillimum nobis Guiana præbet, corticem nempe arboris SIMAROUBA (1) apud incolæ dictæ; ut Macer, sic ille nobis est exoticus; parem jamdudum apud nos, quàm apud Guianenses, effectum constanter præstat; color ei ex albo flavesceus, nullus odor, sapor subamarus, lentescens sibi fibris confans, candido, levissimo insipidoque radicum, stipitum truncique ligno hærens à quo facile separatur. Decoctus primum ad unciam aut semissem in minimâ aquæ copiâ, sic apud nos ut in Guianâ propinatus, vomitus sæpè incommodosque

(1) Excelsæ illius arboris, apice tantum ramosæ, folia sunt alterna, pinnata, foliolis ovatis, integris, alternatim costæ in acumen oblongum desinenti utrinque annexis; flores masculi & feminei, simul in eadem paniculâ tum axillari, tum terminali. Masculum florem constituunt petala quinque albicantia, calyci monophyllo quinqueadentato inserta ad ambitum disci cui germen sterile imponitur; stamina decem disco insidentia; squamulæ totidem basi staminum intus adnatæ. Feni incoflori calix idem, eadem corollâ; stamina defunt, non tamen squamulæ; pistillum è gemminibus quinque invicem germina, & in totidem drupas olivæformes, testâ fragili monopermâ sacras, receptaculo carnosio orbiculato lateraliter infixas abeunt. Hunc Simaroubæ characterem observavit D. FUSEE & ABLET Botanista studiosius, qui Regio jussu ignotas Guianæ plantas perquisivit, descripsitque fœdulo; eas iconibus expressas in optimo opere mox promulgabit.

ferè semper sudores, & majora nonnunquam feri sanguinisque profluvia promovit, quo factum est ut pænè oblivioni datum sit; sed correctis dosibus experientia rerum magistra salubritatis punctum attingit. Corticis ninutim secti drachmas duas in aquæ libris duabus ad tertiam humiditatis consumptionem decoque, decocti in doles quatuor divisi unam tertiâ quâque horâ tepidam propina, vel corticis aut ligni pulveratorum diachmam semissem in aquæ puræ unciiis duabus dilutam, aut cum adianti syrupo in bolum redactam pro unâ dosi, horâ opportunâ præbe, repetitis hujus medicaminis sub quâlibet formâ dosibus ad integram usque sanationem. Perficitur illa absque ullo decocti potûs fastidio, ullâ per vomitum, vel per secesum evacuatione; sedantur tamen unius diei spatio dolorum cruciatus, redit citò somnus, urinæ sunt copiosiores & limpidae, rariores evadunt evacuationes, fæcum odor foetidus cessat, color immutatur, è liquidis incrassescunt, cibos æger appetit, & brevi reficitur.

I V.

ADMIRANDÆ virtutis causam siscitaris; in ipsâ Guianei corticis cum spasmodici intestinorum motûs ratione reperies. Hic præternaturalis habetur, nonnisi quia vel citator, vel irregularis, nec voluntati obtemperat, mero succi nervi vitio, cuius non modò depravationem corrigendi, sed & motûs frequentiam coercendi gummi-resinosæ Simaroubæ partes vim habent. Quid contra morbi sacri, hystericæ & melancholicæ affectionum convulsivos motus aliud præstare valent celebrata medicamenta Visci arborum, Pœoniæ, Aparines ac Galli pulveres aut decocta? Quodè tendunt leviter narcotica, Croci filamenta, Cynoglossi radix, Lactucæ sylvestris folia, Papaverum capita, & Hyoscyami albi semina? si convulsivos illa cæterarum corporis partium motus sistant, quidni & intestinorum? id Simaroubæ peculiare est præ cæteris, ut dum illa convulsivos motus curant, functiones alias lædant; his salvis, illos solus Guianeus cortex sanat: imò dum intestinis in decocto propinatus balsamum suppeditat, stomachum etiam immoderatis alvi fluxibus debilitatum corroborat, ciborum appetentiam excitat, eorumque digestionem amaris, incisivisque partibus favet, necnon & erosæ intestinorum membranæ interiori sublatum ab acrioribus excrementis mucum restituit. Novo ergo efficacissimoque medicamine simplicium classis hoc cortice locupletior fiet, cum singulari virtute antispasmodicâ, stomachicâ, narcoticæ vulgaris præcellat, cum astringentia longè superet, quæ non impunè fluentibus hæmorrhoidibus aut mulierum catameniis interius præbentur, feliciterque haustio Simaroubæ decocto, cessante noxiæ alvi fluxu evacuanda, fluentiaque cætera liberè ac securè eliminentur; undè & antihystericâ vi plerumque pollere pluribus experimentis probatum est. Absit tamen ne Empiricorum more hoc unicum efficax certò remedium universi generis alvi fluxibus, convulsivisque motibus pronuntiemus: cum serobiliosas, mucosas, sanguinolentasque ex cancroso intestinali ulcere, ex pulmonum abdominisque abscessu, ex obstructis scirrhisve mesenterii glandulis excretiones, vel prorsus insanabiles, vel Simaroubæ usu non debellandos bonâ fide agnoscamus. Naturali medicaminis efficaciam unum addamus ad perfectam ægri curationem observandum necessariò, nempe & in ejus quâcumque aliâ inveteratâ excretionem usu applicando prudentiam, & in arboris cortice aut ligno eligendo, & in eo decocti vel pulveris formâ administrando, pro variâ ægrorum ægritudinumque ratione, necnon de dosi prescribendâ temerè non statuendum, cum evacuatis jam stomachi primarumque viarum fordibus factum mitius malum semidrachmæ ligni pulverati uni vel alteri dosi quandoque cedat, & contrâ accedente cacochymia ad sæva morbi symptomata nonnisi pluribus repetitis decocti corticis dosibus vincatur.

V.

PRÆSENTANEORUM medicaminum ea est fors, ut in scenam medicam vix prolata innumeris telis oppugnentur; patetis efficaciam laus persæpè subdolis rationibus minuitur: sic non sine convitiis Cortex Peruvianus in simplicium medicamentorum familiarum ascribi meruit, Cognitâ jam Ipecacuanhæ virtute, si non utilem, tantum saltem ei succedancum concedunt esse Simaroubam, nullo utriusque facto agendi discrimine, nullâque observatâ alvi fluxuum differentiâ Dyntenterias vel ab infarcto stomacho, vel ab obstructis mesenterii aut intestinorum glandulis excretiones vomitu curare Brasiliæ radici detur; cortici Guianeo serobiliosos, sanguinolentos, mucososque alvi fluxus à continuo intestinorum convulsivo motu inveteratos, illæstâ stomachi functione & absque morfu sedando sanare concedatur. Spasmodicis

intestina motibus affici posse quis neget, frequenti excretorum præcipitatione, viscerum tormi-
nibus, recti tenesmo, symptomatumque subitâ post haustum medicaminis anodyni potum cessa-
tione convincatur, si novam hanc proximam diarrhœæ fluxûsque hepatici causam agnoscere ne-
mini non licet; quidni soli exotico medicamini tribuendum, quod à nostratibus antispasmodi-
cis obtineri pariter non poterit? horum usu levamen certò, rarò sanationem perfectam conse-
queris: horum inefficacia remedium præstantiori virtute præditum desiderari hæcenus probavit.
Nec primæ, nec alteri, nec tertiæ dosi nonnunquam malum cedere objicient fortè, nonnul-
laque aliquoties redire morbi symptomata, ac indurescentia, curationis initio, excrementa in-
terdum adhuc liquescere & cruentari: quid hæc in re occurrit, quod in probatissimi cujuscun-
que remedii usu non accadat, si absque regimine administretur? & licet unicâ Guianei corticis
decocti aut pulveris dosi etiam rebelles diarrhœas sanatas esse compertum sit, nùm minoris
ideò habendus, si nonnisi aliquandò quartæ aut sextæ dosis portione morbum vicerit? Diar-
rhœa aut dysenteria pluribus à mensibus vel ab annis laborantium majorem numerum hoc me-
dicamine incolumitatem citius certiusque quàm ab ullo quolibet alio recuperâsse sufficit, idque
absque ullo fastidio, salvis cæteris functionibus, & sine ullo futuri alijs incommodi periculo.

Ergo inveteratis alvi fluxibus SIMAROUBA.

DOMINI DOCTORES DISPUTATURI.

*M. Ladovicus-Gilbertus BOY-
ROT DE JONCHERES.*

*M. Cosma-Augustinus LEZU-
RIER.*

*M. Paulus-Jacobus MALOUIN,
Medicinæ Professor Regius,
&c.*

M. Carolus SALLIN.

*M. Nicolaus JEANROY, Chi-
rurgiæ Latino idiomate Pro-
fessor, Regii Medicorum Col-
legii Nanceianorum Socius ho-
norarius.*

*M. Bernardus DE JUSSIEU;
Regi à Consilijs & Secretis,
Regiæ Scientiarum Academiæ,
Regiæque Societatis Londonen-
sis Socius & in Horto Regio
Botanices Prodemonstrator.*

*M. Simon VACHER¹, Regis
exercituum in Insulâ Corsicâ
Medicus.*

*M. Augustinus ROUX, Regiæ
Societatis Rei Agrariæ, nec-
non Regiæ Scientiarum Aca-
demiæ Burdigalensis Socius.*

*M. Guillelmus - Josephus DE
L'EPINE, Antiquus Facul-
tatis Decanus.*

Proponebat Parisiis ANTONIUS-LAURENTIUS DE JUSSIEU, Lugdunæus, Doctor Me-
dicus Remensis, Lugdunensis Academiæ Socius, necnon Saluberrimæ Facultatis Medicinæ
Parisiensis Baccalaureus, A. R. S. H. 1772. A SEXTA AD MERIDIEM.